



# საქართველო GEORGIA

გარემოს დაცვისა და  
სოფლის მეურნეობის  
სამინისტრო

MINISTRY OF ENVIRONMENTAL  
PROTECTION AND AGRICULTURE  
OF GEORGIA

N 853/01  
01/02/2022

853-01-2-202202011413



შპს „აკვაპონტს“

მის: ქ. თბილისი, ვაკის რ-ნი,  
შალვა ნუცუბიძის ფერდობი II მ/რ, II კვ, № 2ა, ბ.4,

ასლი: ლენტეხის მუნიციპალიტეტის მერიას

საქართველოს გარემოს დაცვისა და სოფლის მეურნეობის სამინისტრომ განიხილა თქვენი 2021 წლის 31 დეკემბრის განცხადება (სამინისტროს რეგისტრაციით N24597), რომელიც ეხება ლენტეხის მუნიციპალიტეტში, მდ. ხოფურზე 5.22 მგვტ დადგმული სიმძლავრის „ხოფური 1 ჰესის“ მშენებლობის და ექსპლუატაციის სკოპინგის ანგარიშს.

გაცნობებთ, რომ წარმოდგენილ დოკუმენტაციაში დაზუსტებას საჭიროებს დაგეგმილ საქმიანობასთან დაკავშირებული შემდეგი საკითხები:

- დაზუსტებას საჭიროებს საპროექტო ინფრასტრუქტურის, მათ შორის სათავე კვანძების (მდ. ხოფურზე და მის შენაკადზე) და მილსადენის პარამეტრების (გაბარიტული ზომები და სხვ.) შესახებ ინფორმაცია;
- დაზუსტებას საჭიროებს საქმიანობის განხორციელების ადგილის ალტერნატივების შესახებ ინფორმაცია. კერძოდ, წარმოდგენილი ანალიზი ზოგადია, მოცემული მახასიათებლები კი რის საფუძველზეც უარყოფილი იქნა ალტერნატიული მდებარეობა საჭიროებს სათანადო დასაბუთებას. ამასთან, საპროექტო ალტერნატივის უარყოფით მახასიათებლებში აღნიშნულია - „გაიზრდება საპროექტო ეგხ-ს დერეფანი“. აღნიშნული ინფორმაცია ვერ ჩაითვლება დასაბუთებად, ვინაიდან ელექტროგადამცემი ხაზის გაყვანაზე ავტორები უთითებენ, რომ განხილული იქნება დამოუკიდებელ პროექტად;
- დაზუსტებას საჭიროებს ინფორმაცია ეკოლოგიური ხარჯის შესახებ, ასევე ინფორმაცია მისი საკმარისობის შესახებ, წყლის და წყალზე დამოკიდებული ფაუნის წარმომადგენლებზე ზემოქმედების, ასევე მდინარის კალაპოტის მორფოლოგიის და ეკოლოგიური პროცესების შენარჩუნების ჭრილში;
- დაზუსტებას საჭიროებს ინფორმაცია სველი ხევის მიწისქვეშა გადაკვეთის შესახებ. მათ შორის, მიწისქვეშა გადაკვეთისთვის საჭირო ინფრასტრუქტურის (დიუკერი) მშენებლობის და გადაკვეთის სამუშაოების დროს მოსალოდნელი ზემოქმედების შესახებ;
- სკოპინგის ანგარიშში მოცემული ინფორმაცია ბიოლოგიური გარემოს შესახებ ზოგადია და საჭიროებს დაზუსტებას. წარმოდგენილი უნდა იყოს უშუალოდ

საპროექტო ტერიტორიის გავლენის ზონაში არსებულ ბიოლოგიური გარემოსა და მასზე ზემოქმედების შესახებ სათანადო მონაცემები;

- დაზუსტებას საჭიროებს ინფორმაცია მდ. ხოფურსა და მის უსახელო შენაკადში არსებული იქტიოფაუნის, მათ შორის საქართველოს და საერთაშორისო წითელ ნუსხაში შეტანილი, სახეობების შესახებ;
- სკოპინგის ანგარიშში (თავი 4.2.2) გეოლოგიური კვლევის შედეგებში მოცემული ინფორმაცია გაურკვეველია, რადგან არ შეიცავს მონაცემებს ჩატარებული კვლევისა და მიღებული შედეგების შესახებ;
- წარმოდგენილი სკოპინგის ანგარიშის გეოლოგიურ ნაწილში ფიქსირდება ტერმინოლოგიური უზუსტობები, რაც დაკავშირებულია არასწორ თარგმანთან და საჭიროებს კორექტირებას;
- დაზუსტებას საჭიროებს ინფორმაცია მდ. ხოფურის და მისი შენაკადების ღვარცოფული ბუნების შესახებ;
- სკოპინგის ანგარიშის თანახმად, 35 კვ. ეგზ წარმოადგენს ცალკე პროექტს, რომელზეც მომზადდება ცალკე დოკუმენტი და შესაბამისი ნებართვების მიღება მოხდება კანონმდებლობის მოთხოვნათა გათვალისწინებით. აღნიშნული ჩანაწერის მიუხედავად, წარმოდგენილ Shp ფაილებში მოცემულია ასევე ქსელზე დაერთების/ეგზ-ის საპროექტო ნახაზები. შესაბამისად საკითხი საჭიროებს დაზუსტებას;
- გარემოზე ზემოქმედების სრულფასოვანი/სრულყოფილი შეფასებისათვის და ეფექტური შემარბილებელი, პრევენციული, საკომპენსაციო ღონისძიებების დასახვის მიზნით მიზანშეწონილია ქსელთან მიერთების პროექტი (35 კვ. ელ. გადამცემი ხაზი) წარმოდგენილ იქნეს „ხოფური 1 ჰესის“ პროექტთან ერთად, ერთიანი სკოპინგის ანგარიშის სახით, როგორც „ხოფური 1 ჰესის“ პროექტის ერთ-ერთი შემადგენელი ნაწილი/კომპონენტი. აღნიშნული სახით სკოპინგის ანგარიში წარმოდგენის შემთხვევაში, მოცემული უნდა იყოს ინფორმაცია: საერთო ქსელთან მიერთებისათვის განკუთვნილი საპროექტო ეგზ-ის ძირითადი პარამეტრების, ფიზიკური მახასიათებლების, ტექნიკური გადაწყვეტების, ასევე მისი გაყვანით გამოწვეული ზემოქმედების საკითხების და შესაბამისი შემარბილებელი ღონისძიებების შესახებ ინფორმაცია. ამასთან, მოცემული უნდა იყოს კუმულაციური ზემოქმედების შესახებ ინფორმაცია, რეგიონში არსებული ან/და დაგეგმილი ელექტროგადამცემი ხაზების გათვალისწინებით. **ზემოაღნიშნულის განუხორციელებლობის შემთხვევაში სკოპინგის ანგარიშში წარმოდგენილი იქნეს სათანადო დასაბუთება, როგორც გარემოსდაცვითი, ისე ტექნიკურ-ეკონომიკური კუთხით;**
- სკოპინგის ანგარიშში მოცემულია არაქართულენოვანი ინფორმაცია საპროექტო ინფრასტრუქტურის შესახებ. გაცნობებთ, რომ სამინისტროში ადმინისტრაციული წარმოების ენა არის ქართული, შესაბამისად სკოპინგის ანგარიშში საპროექტო მონაცემები წარმოდგენილი უნდა იყოს ქართულ ენაზე;
- დაზუსტებას საჭიროებს ინფორმაცია მდინარე ხოფურის და მისი შენაკადის ჰიდროლოგიური მახასიათებლების შესახებ;
- სკოპინგის ანგარიშში მოცემული ჰიდროლოგიის თავი შეიცავს ხარვეზებს და გაურკვეველ ტერმინოლოგიას, რაც საჭიროებს დაზუსტებას და დამატებით განმარტებებს, მაგ:
  - „მდინარე ცხენისწყლის გრძელვადიანი აზომვა“;
  - „ჩამონადენის სპეციფიური წყალშეკრები“;
  - „სპეციფიური ნალექიანობა Pf“;
  - „მთავარი ხარჯი“;

- „გამოყენება 1 წლის ყოველდღიური გაზომვის განაწილების კოეფიციენტი“ (მდ. ჯონოულთან დაკავშირებით);
- სკოპინგის ანგარიშში გამოყენებული ნალექების რუკის წყაროდ მითითებულია „საქართველოს ჰიდროლოგიური ინსტიტუტი“. უნდა აღინიშნოს, რომ მსგავსი დასახელების ინსტიტუტი საქართველოში არ არსებობს;
- 77-ე გვერდზე მოცემული ცხრილი დასაზუსტებელია (სტანდარტული გადახრა - 55.004, რომელ მახასიათებელს ეკუთვნის);
- არ არის შეფასებული და დაზუსტებას საჭიროებს სტატისტიკური მახასიათებლების მდგრადობა;
- გრაფიკული ილუსტრაციები და ცხრილები საჭიროებს კორექტირებას;
- სკოპინგის ანგარიშში, მათ შორის ჰიდროლოგიური ნაწილი, წარმოდგენილ უნდა იქნას შესწორებული ანგარიში მათ შორის შესაბამისი ტექნიკური ტერმინოლოგიით;
- შემარბილებელი ღონისძიებების ჩამონათვალში, ჰესის ნეგატიური ზემოქმედების საკომპენსაციოდ, მიზანშეწონილია მიეთითოს დათევზიანების ღონისძიებების შესახებ ინფორმაცია;
- სკოპინგის ეტაპზე პროექტის განხორციელებით მოსალოდნელი ზემოქმედების სათანადო შეფასების მიზნით, დაზუსტებას საჭიროებს ინფორმაცია სამშენებლო ბანაკის/მოედნის (მდებარეობის მითითებით) შესახებ;
- წარმოდგენილი მთლიანი 69276 მ<sup>2</sup> ფართობიდან (Shp ფაილი), „სახელმწიფო ტყის ფონდის საზღვრების დადგენის შესახებ“ საქართველოს მთავრობის 2011 წლის 4 აგვისტოს №299 დადგენილებით დამტკიცებული სახელმწიფო ტყის ფონდის საზღვრების მიხედვით, 59037 მ<sup>2</sup> წარმოადგენს სსიპ ეროვნული სატყეო სააგენტოს მართვას დაქვემდებარებულ სახელმწიფო ტყეს. კერძოდ, ლენტეხის სატყეო უბნის ხოფურის სატყეოს კვარტალ N 9; 12; 16; 50. სახელმწიფო ტყის ტერიტორიაზე, „ტყითსარგებლობის წესის შესახებ“ დებულების დამტკიცების თაობაზე საქართველოს მთავრობის 2021 წლის 18 მაისის N221 დადგენილებით (თავი VII-XIV) განსაზღვრული საქმიანობა ან მისი განკარგვა საჭიროებს შეთანხმებას სახელმწიფო ტყის მართვის უფლების მქონე ორგანოსთან.

ყოველივე ზემოაღნიშნულიდან გამომდინარე, სამინისტრო სკოპინგის დასკვნის გაცემის მიზნით ადმინისტრაციულ წარმოებას დაიწყებს აღნიშნული შენიშვნების/საკითხების გათვალისწინებით გადამუშავებული სკოპინგის ანგარიშის წარმოდგენის შემდეგ.

მოცემული გარემოების გათვალისწინებით დამატებით გაცნობებთ, რომ 2022 წლის 3 თებერვალს 14:00 საათზე ლენტეხის მუნიციპალიტეტში, სოფ. ხოფურის ადმინისტრაციული ერთეულის შენობაში დაგეგმილი შპს „აკვაპონტის“ მდინარე ხოფურზე 5,22 მგვტ დადგმული სიმძლავრის „ხოფური 1 ჰესის“ მშენებლობის და ექსპლუატაციის პროექტის სკოპინგის ანგარიშის საჯარო განხილვა აღარ გაიმართება.

ნინო თანდილაშვილი



მინისტრის მოადგილე

